



**PRAVILA I PROPOZICIJE
ATLETSKE REKREATIVNE LIGE**

PRAVILA

1. OPŠTE ODREDBE

Član 1.

Atleška rekreativna liga (u daljem tekstu Liga) je sportska manifestacija slobodna za sve rekreativce starije od osamnaest godina koji se žele baviti rekreativnim trčanjem u takmičarskoj formi.

Član 2.

Liga ima zadatak da okuplja rekreativce trkače, te da im omogući ravnopravan sistem takmičenja (specifičnosti Lige navedene u Propozicijama) koji ima za cilj da im omogući psihičko, zdravstveno, socijalizacijsko i svako drugo zadovoljstvo bez ekonomskog profitabilnog karaktera.

Član 3.

Ovim Pravilnikom utvrđuju se Pravila i propozicije (u daljnjem tekstu «Pravila i propozicije») Lige.

Član 4.

Odredbe ovog Pravilnika obavezuju sve Članove Lige i organizatora Lige Atletski klub Novi Grad Sarajevo (u daljnjem tekstu «Organizator»)

2. ČLANSTVO, PRAVA I DUŽNOSTI U LIGI

Član 5.

Stupanje u članstvo Lige je dobrovoljno i iskazuje se podnošenjem zahtjeva za članstvo na web adresi Organizatora **www.atleta.ba**.

Član 6.

Članom Lige može postati svaki rekreativac, stariji od 18 godina, koji nije registrovan kao profesionalni sportista ili amater sportista za bilo koji sportski Savez, Klub ili bilo koju drugu organizaciju koja ima za cilj razvoj bilo kojeg vrhunskog ili amaterskog sporta.

Nakon podnesenog zahtjeva Organizator razmatra podneseni zahtjev i odlučuje da li prihvata ili odbija isti.

Ukoliko se zahtjev prihvati, pristupa se potpisivanju pismene izjave Člana Lige, te isti dobiva člansku legitimaciju, startni broj koji će imati tokom čitave Lige i time postaje punopravni Član Lige.

Organizator ima pravo da odbije zahtjev za članstvo, o čemu se uredno i blagovremeno podnosioc obavještava, te ovim odbijanjem istom podnosiocu nije dozvoljeno da bude Član Lige.

Član 7.

Zahtjev za članstvo se može podnijeti tokom čitave godine. Ukoliko se podnosiocu zahtjev za članstvo prihvati, isti Član može nakon izvršenih obaveza nastupiti na prvoj sljedećoj utrci i od tog trenutka za njega počinje skupljanje bodova.

Član 8.

Prava i dužnosti članova Lige su :

- da učestvuju na onim utrkama Lige u kojim žele;
- nisu primorani učestvovati na svim utrkama Lige;
- da pokreću pitanja i da daju prijedloge od interesa za razvoj i rad Lige;
- da se pridržavaju odredbi "Pravilnika i propozicije";
- da plaćaju godišnju članarinu,
- da plaćaju startninu prije svake utrke za koju se odluče nastupiti.

Član 9.

Visina godišnje članarine iznosi 30.00KM i istu svaki Član mora uplatiti za svaku sezonu ukoliko želi da postane punopravan Član Lige za tu sezonu.

Član 10.

Članstvo u Ligi prestaje:

- dobrovoljnim istupanjem iz Lige,
- isključenjem zbog težih povreda kodeksa ponašanja i pravila Lige, povreda moralnih i društvenih normi.

3. ZABRANE I ISKLJUČENJA

Član 11.

Kazna zabrane učešća na jednoj do tri utrke.

Kazna se izriče zbog prekršaja kao što su:

- psovanje i vrijeđanje drugog Člana Lige, sudaca, voditelja Lige, gledatelja,
- nesportsko ponašanje prema službenim osobama ili drugim Članovima Lige, nepristojne geste i pokreti, sve radnje koje štete ugledu Lige na način da izazivaju trkača, gledatelja,
- ometanje i prekidanje drugih trkača u toku utrke,
- ponavljanje lakših disciplinskih prekršaja,
- izazivanje drugog trkača guranjem, povlačenjem i slično (za vrijeme i poslije utrke).

Član 12.

Kazne zabrane učešća u Ligi na određeno vrijeme ili isključenje iz Lige

Kazna se izriče zbog prekršaja kao što su:

- grubog prekršaja nad drugim Članom Lige sa težim posljedicama,
- težeg nesportskog ponašanja,
- udaranja, fizičkog nasrtaja ili pokušaja fizičkog napada na drugog Člana Lige, suca, voditelja Lige, službenu osobu, gledatelja,
- krivotvorenja isprava,
- ponavljanja disciplinskih prekršaja,
- ostalih disciplinskih prekršaja koji nisu regulirani ovim Pravilnikom

Član 13.

Odluku o zabrani ili isključenju iz Lige donosi Upravni odbor Organizatora.

Inicijativu za donošenje odluke o zabrani ili isključenju iz Lige mogu podnijeti najmanje tri člana Lige ili jedan član organizacionog osoblja.

Inicijativa se pokreće u pismenoj formi i dostavlja Upravnom odboru Organizatora.

Upravni odbor Organizatora na osnovu podnijete inicijative i uvida u dostavljenu dokumentaciju, odlučuje hoće li odmah donijeti odluku o isključenju ili će pokrenuti postupak za isključenje radi prikupljanja dopunskih činjenica.

Član, protiv kojeg je pokrenut postupak, može nastupati u Ligi do konačne odluke, nakon koje se postupa shodno donešenoj odluci.

4. PRAVO NASTUPA

Član 14.

Pravo nastupa u Lige imaju:

- Članovi Lige,
- koji su zdravstveno sposobni. Za ovo rekreativci samostalno preuzimaju odgovornost, te se Organizaor od svake neželjene situacije po ovom pitanju ograđuje;
- koji su platili startninu Organizatoru.

Za provođenje ovih odredbi odgovoran je voditelj Lige.

Član 15.

U slučaju neispunjavanja bilo kog od navedenih uslova za nastup, takmičaru se ne dozvoljava nastup. Ukoliko je zbog propusta odgovornih službenih lica takmičar ipak nastupio, po utvrđenom propustu, taj se takmičar diskvalifikuje, a njegov rezultat briše iz zapisnika, odnosno zvaničnog biltena. Prekršilac se prijavljuju disciplinskoj komisiji.

5. KALENDAR, DATUM I SATNICA UTRKA LIGE

Član 16.

Prijedlog Kalendara Lige se donosi isključivo po propozicijama ovog Pravilnika za svaku i to najkasnije do 15. augusta. Finalna verzija Kalendara Lige se donosi sedam dana nakon objavljivanja Kalendara takmičenja Atletskog Savez BiH u kome je precizirano kad je Atletski miting Novi Grad Sarajevo. Organizator može organizovati takmičenje samo na datum i u vrijeme koji su unaprijed određeni Kalendarom Lige.

Član 17.

Ukoliko je, usljed nepredviđenih okolnosti, onemogućena organizacija utrke, ili ukoliko 30% članova Lige iskaže želju da se datum utrke pomjeri za neki drugi vikend zbog želje da učestvuju na nekoj drugoj utrci van Lige, a koja se održava isti vikend kad je planirana utrka naše Lige, Organizator odgađa takmičenje za novi termin. Voditelj lige uz saradnju sa Organizatorom dužan je u roku od 48 sati obavjestiti učesnike o drugom terminu u kojem će se održati odgođena utrka.

Član 18.

U slučaju da, usljed nepredviđenih okolnosti, utrka, koja je u toku, mora biti prekinuta, voditelj Lige, uz saglasnost Organizatora, otkazuje ili odlaže utrku. Voditelj lige uz saradnju sa Organizatorom dužan je u roku od 48 sati obavijestiti učesnike o drugom terminu u kojem će se održati prekinuta utrka. U ovom slučaju plaćena startnina ostaje važeća i za drugi termin u kojem se bude održavala prolongirana utrka.

6. PRIJAVE

Član 19.

Organizator ima pravo u slučaju potrebe da zatraži prijavu Članova za neku od utrka Lige, a to je dužan obavijestiti Članove lige 72 sata prije utrke, a Članovi koji žele učestvovati na toj utrci dužni su poslati prijavu 24 sata prije utrke voditelju Lige. Svaki prijavljeni Član u ovom slučaju mora navesti: startni broj, prezime i ime, puni datum rođenja. Prijava mora biti poslana putem maila u protivnom prijava neće biti prihvaćena i tako neće biti dozvoljen nastup. U slučaju da Organizator ne zatraži ovu prijavu, Članovima Lige je dozvoljeno učešće na utrci uz poštivanje svih članova tačke 7. ovog Pravilnika.

7. ORGANIZACIJA UTRKE LIGE

Član 20.

Tehnički sastanak

Prije svake utrke Organizator je dužan da organizuje tehnički sastanak. Cilj tehničkog sastanka je da se učesnici upoznaju sa namjerama organizatora i svim drugim bitnim faktorima koji mogu da utiču na tok utrke. Tehničkom sastanku mora prisustvovati, voditelj Lige, glavni sudija utrke i zapisničar. Tehnički sastanak počinje 45 minuta prije početka prve utrke, a mora završiti najmanje 30 minuta prije početka iste.

Član 21.

Startnina

Startnina za utrke koje su pod organizacijom Organizatora Lige (AK Novi Grad Sarajevo) je 5 KM. Startnina se uplaćuje kod blagajnika za svaku utrku i to prije tehničkog sastanka. Pri uplati startine potrebno je blagajniku Lige predložiti Člansku kartu i startni broj. Za "eksterne" utrke ovaj iznos se ne uplaćuje.

Član 22.

Prijavnica

Organizator takmičenja može pripremiti prijavnicu, koja sa radom počinje najmanje 30 minuta prije početka utrke.

Takmičari i takmičarke se moraju prijaviti u prijavnicu najkasnije 10 minuta prije početka utrke.

U slučaju da Organizator odluči da nije potrebno pripremiti prijavnicu, sve navedene obaveze u prethodnom stavu ovog Člana, učesnik je dužan izvršiti kod startera utrke.

Ako se učesnik ne prijavi prijavnoj službi ili starteru u propisano vrijeme, gubi pravo nastupa u toj utrci i starter ga briše sa startne liste.

U prijavnici ili kod startera se ne može vršiti prijava novih Članova Lige, već samo onih članova koji su postali Članovi lige po Članu 6. ovog Pravilnika.

Član 23.

Sprovođenje takmičenja

Organizator je dužan organizovati utrku prema Vodiću za organizaciju atletskih takmičenja IAAF-a, kojeg mora posjedovati organizator na stadionu.

Organizator i voditelj Lige su obavezni da obezbijede regularnost takmičenja i omoguće gledaocima atletski ugođaj, zato se zabranjuje ulazak na atletsku stazu svima koji nemaju pravo nastupa ili osoblju organizacije utrke.

Član 24.

Ostale obaveze organizatora su:

- Starter,
- Sudije za štopanje vremena,
- Elektronsko mjerenje i foto-finiš sa odgovarajućom licencom (samo na finalnoj utrci);
- Propisana računarska obrada podataka;
- Instalacija i upotreba svih rekvizita i aparata potrebnih za regularan tok utrke.

Član 25.

Obaveze učesnika utrke su:

- da na vrijeme izvrše prijavu na prijavnici ili starteru,
- koji su propisno obučeni (sportska majica, šorc) u sportsku opremu;
- da zakače startni broj na svoju prednju stranu tijela, te da isti bude vidljiv tokom cijele utrke

Član 26.

Proglašenje

Proglašenje pobjednika na pojedinačnim utrkama Lige neće biti.

Član 27.

Rezultati i ukupni plasman Lige

Voditelj Lige uz saradnju sa Organizatorom mora što je prije moguće, a najkasnije 24 sata, po završetku utrke objaviti rezultate i ukupni redoslijed i plasman Članova Lige nakon svake utrke.

8. PROGLAŠENJE POBJEDNIKA PO KATEGORIJAMA, APSULTNOG POBJEDNIKA LIGE I NAGRADNI FOND

Član 28.

Proglašavaju se:

- prva tri prvoplasirana pobjednika svake kategorije u muškoj i ženskoj konkurenciji Lige,
- prva tri prvoplasirana pobjednika u apsolutnoj kategoriji (sve kategorije) u muškoj i ženskoj konkurenciji Lige,

u Propozicijama navedene kategorije i kako se određuje konačni plasman Lige.

Proglašenje će biti upriličeno nakon finalne utrke, koja se održava na Mitingu Novi Grad Sarajevo. Proglašenje pobjednika se vrši redosljedom od trećeg do prvog mjesta. Ceremonijal uručjenja medalja/diploma mora se odvijati dostojanstveno i u skladu sa uobičajenim protokolom uručjenja priznanja na međunarodnim atletskim takmičenjima.

Za tri prvoplasirana pobjednika, po kategorijama, Organizator mora obezbijediti odgovarajuća priznanja. Za tri prvoplasirana pobjednika, u apsolutnoj kategoriji, Organizator mora obezbijediti odgovarajuća priznanja i novčane nagrade. Organizator može da pored tri prvoplasirana pobjednika Lige nagradi i veći broj sljedećih plasiranih Članova po ukupnom plasmanu Lige, što ovisi od nagradnog fonda kojim će raspolagati Organizator. O visini nagradnog fonda i kojim sistemom će isti biti podjeljen, odlučuje Organizator. O svim ovim detaljima oko nagradnog fonda i sistemom podjele Organizator je dužan obavijestiti Članove Lige i to u objavljivanju raspisa za prijavu Članova za novu sezonu Lige.

9. ŽALBE

Član 29.

Za žalbe važe odredbe "Pravila za atletska takmičenja IAAF" i ovog Pravilnika. U pismenoj žalbi, koja mora biti priložena najkasnije 30 minuta nakon završene utrke ukoliko je riječ o žalbi na tok ili organizaciju utrke, ili 30 minuta nakon objave rezultata ukoliko je riječ o žalbi na objavljene rezultate, mora biti na odgovarajući način dostavljena Organizatoru. Uz žalbu je potrebno priložiti i žalbenu taksu u visini od 50 KM koja se u slučaju pozitivnog rješenja vraća žalitelju. Ako pritužba nije pozitivno rješena, taksa ulazi u prihod organizacije Lige.

Žalbe rješava voditelj Lige, glavni sudija sa utrke, i još dva Člana Lige koji su unaprijed delegirani u žalbenu komisiju. Odluke ove komisije su konačne.

10. VODITELJ LIGE

Član 30.

Zadaci voditelja Lige:

- voditelj lige je službeni predstavnik Organizatora;
- vodi evidenciju Članova Lige i svu drugu potrebnu dokumentaciju Lige;
- komunicira sa Članovima lige i obavještava ih o svim bitnim faktorima koji utiču na tok Lige;
- prihvata prijave i pravi startne biltene;
- objavljuje rezultate i vodi bodovnu tabelu Članova Lige;
- obavlja dužnosti, koje mu je povjerio Upravni odbor Organizatora sa Pravilima za atletska takmičenja IAAF, odnosno «Pravilima i propozicijama» Lige;
- provjerava članske knjižice, odnosno sve potrebne podatke za nastup;
- provjerava pravilnost borilišta i opreme, kao i pravilnost ispunjavanja takmičarskih zapisnika, rad prijavnice, te u slučaju utvrđivanja nekih manjkavosti zahtjeva njihovo otklanjanje;
- zabranjuje nastup Članova koji se nisu javili u prijavnicu, odnosno onima koji na takmičenju ne nose odgovarajuću opremu ili startni broj;
- u vrijeme takmičenja u vezi je sa tehničkom organizacijom utrke, sekretarom utrke, nadzornom službom (brine o redu na takmičenju), sa vođom sudija i službenim ljekarom;

- prije, u toku i poslije utrke rješava sve sporne slučajeve, za koje je nadležan;
- kod kršenja Pravila za atletska takmičenja IAAF (čl. 147., tačka 1.) odnosno ovih «Pravila i propozicija», koje nije moguće riješiti na takmičenju, prijavljuje prekršioca Upravnom odboru Organizatora;
- Članu, koji po «Pravilima i propozicijama», nema pravo nastupa, ne dozvoljava nastup. U slučaju nastupa rezultat se briše, a Član se prijavljuje Upravnom odboru Organizatora.
- voditelj Lige na utrci nosi posebnu oznaku i sa sobom ima žuti i crveni karton;

11. EKSTERNE UTRKE

Član 31.

Sve utrke koje su u kalendaru Lige, a koje nisu pod organizacijom Organizatora Lige su "eksterne" utrke.

Član 32.

Članovi Lige koji budu učestvovali u "eksternim" utrkama podliježu "Pravilima i propozicijama" (uplata, prijava, kodeks oblačenja, itd.) tih utrka, odnosno Organizatora tih utrka.

Član 32.

Voditelj Lige, je dužan nakon završene "eksterne" utrke prikupiti rezultate i iste unijeti u bazu podataka Lige.

PROPOZICIJE LIGE

Liga se održava u dvanaest kola koji su podjeljeni u dvije etape. Prva etapa se održava u periodu septembar-novembar, a druga etapa u periodu april-juni. Učesnici Lige u svakoj utrci skupljaju bodove. Četiri najbolja učesnika iz svake kategorije u muškoj i ženskoj konkurenciji, nakon završetka svih dvanaest kola, ostvaruje pravo nastupa na Finalnoj utrci koja se održava na Atletskom mitingu Novi Grad Sarajevo.

Kola/utrke Lige

Liga ima ukupno dvanaest kola/utrka plus joker kolo/utrku. Svaka etapa ima po šest kola/utrka, oko dvije utrke u jednom mjesecu ovisno o broju vikenda u tom mjesecu ili drugih faktora koji utiču na organizaciju. Finalna trka nije uključena u gore navedeni broj kola.

Joker kolo

Joker kolo je ekstra kolo koje se organizuje nakon obe etape, odnosno nakon svih dvanaest kola, sedmicu prije Atletskog mitinga Novi Grad Sarajevo. U ovom kolu omogućen je nastup svim rekreativcima, bez obzira kad su se učlanili u Ligu, samo u jednoj disciplini, i to samo u onoj disciplini koju su propustili u toku prethodnih dvanaest kola, iz nekih ličnih razloga. U ovom kolu nije dozvoljeno ponavljanje neke discipline u cilju popravljavanja rezultata.

Joker kolo je namjenjn samo za discipline koje se organizuju na atletskoj stazi pod organizacijom Organizatora lige, te nije namjenjen za "eksterne" utrke.

Pravo nastupa

Pravo nastupa imaju svi rekreativci straiji od osamnast godina, u muškoj i ženskoj konkurenciji.

Tip Lige

Liga je otvorenog tipa, i u istoj mogu učestvovati svi zainteresovani rekreativci bez obzira iz kojeg grada ili države dolaze.

Kategorije

Kategorije se odnose na muškarce i žene

- 18-30 godina
- 31-40 godina
- 41-50 godina
- 51+ godina
- Apsolutna (svi učesnici)

Mjesto

Atletska staza u Centru Safet Zajko, za sve utrke koje su pod organizacijom Organizatora Lige (AK Novi Grad Sarajevo), ili lokacija "eksternih" utrka koje su pod organizacijom nekih drugih Organizacija.



Discipline Lige

| |
|--|
| Discipline |
| 5K - staza |
| MILJA - staza |
| 3K - staza |
| 800m - staza |
| 1/2 maraton - cesta |
| 10K - cesta |
| 3K Finalna utrka - Atletski miting Novi Grad sarajevo |

Kalendar Lige

Prvo kolo/utrka se održava prve subote koja pada u mjesecu septembru, iduće kolo/utrka je za dvije sedmice i sve tako dok se ne održi planirani broj kola/utrka prve etape Lige.

Prvo kolo/utrka druge etape, odnosno sedmo kolo treba planirati dvanaest vikenda prije vikenda u mjesecu julu u kojoj je planirano održavanje Atletskog mitinga Novi Grad Sarajevo.

Kalendar za svaku sezonu Lige se izrađuje na osnovu gore postavljenih propozicija i Člana 16. ovog Pravilnika.

Sistem bodovanje

Za sve kategorije, sva kola i finalnu utrku bodovanje se vrši na isti način. Bodovanje se vrši na osnovu ove formule: **WR / rezultat takmičara x 100**. Za svaku disciplinu u kojoj je učestvovao takmičari, bodove dobija na način da se **SVJEKTSKI REKORD** istrčane discipline podijeli sa postignutim **VREMENOM/REZULTATOM TAKMIČARA** i pomnoži sa **100**.

Finalna utrka

Pravo nastupa na Finalnoj utrci ostvaruje po četvero prvih Članova Lige iz svake kategorije u muškoj i ženskoj konkurenciji (tridesetdva ukupno), nakon završenih svih dvanaest kola/utrka. Ukoliko u nekoj kategoriji ne bude učesnika ili ih bude manje od četiri, onda se isti taj broj popunjava sa sljedećim najbolje plasiranim učesnicima iz kategorije koja je najbrojnija. Finalna utrka se održava na Atletskom mitingu Novi Grad Sarajevo.

Ukupni plasman Lige

Ukupni plasman i redoslijed učesnika/ca Lige predstavlja zbir bodova koji je sakupljen u svim kolima/utrkama Lige i Finalne utrke, za sve kategorije i za muškarce i žene. Apsolutni pobjednik/ca Lige je onaj učesnik/ca koji je sakupio/la najviše bodova tokom svih kola/utrka Lige i Finalne utrke, bez obzira koji/ja je završio/la na Finalnoj utrci. Apsolutni pobjednik se proglašava u muškoj i ženskoj konkurenciji. U slučaju izjednačenog konačnog zbira bodova u obzir se uzima veći broj osvojenih prvih, zatim drugih mjesta, trećih, itd.

Proglašenja i nagrade

Organizator će izvršiti proglašenje i nagrađivanje pobjednika/ca kako je određeno Članom 26. i 28. ovog Pravilnika.